


威海衛志



刻威海衛志序



威海為衛肇自前明洪武之三十二年
其地瀕海堦距甯海州百二十里距文登
縣亦不下百里仙阜亘其南古陌踞其北
劉公之島屹然而東峙驚浪雷奔舳舻
駢集千里不見踪跡一旦海氛竊發非衛
所將弁飛督屯軍執兵防禦其害有不
可勝言者我

朝承平百餘年

聖天子煦嫗覆育手拊口吹溥海內外含生負
氣之類莫不回首面內詠仁蹈德輕塵不
飛雖天吳罔象之屬亦罔不効順於是重
臣按視東陲以隸縣請於

朝而威海衛遂廢所以示


聖朝之無外在德不在威也然衛自始置至今
四百年所疆域建置之舊學校典禮之興

人物文章之盛以至於海防之略守禦之
規皆卓然為一方掌故同里郭君文大懼
其湮沒廼踵畢氏舊志成書十卷嗚呼是
書不廢而衛亦賴以不墜余聞之禮入境
問禁入國問俗入門問諱又曰禮從宜使
從俗然則士君子訂風俗之書考地里之
志雖非粉榆舊社生長故邱猶將虛心採
訪度禮而諏事如四牡皇華之使臣皆是

也而況風謠歌舞各附其俗魁梧長者莫
非其舊而願令其如薛鼓之亡弁髦之救
乎哉君子曰樂樂其所自生禮不忘其本
其郭君之謂矣志撰就於乾隆壬戌歲鄉
前輩中丞王公謀梓未果易泰在梓里嘉
郭君之志而終王公之謀為序其成書之
意而板行之

乾隆四十二年歲在丁酉夏四月通奉大夫江

南江寧等處承宣布政使司布政使加三
級紀錄二次里人陶易譔



舊威海衛志序

余為諸生時見明經畢子衡南創立威海衛志殫心考核稱桑梓文獻自畢子以後五十餘年未經增修留心編續者久之奈生晚採訪難周雍正癸卯成進士教習景山意京師距威海二千里鄉人在長安者頗多足以從容諮訪纂成一書以不沒畢子後數十年之事未幾作令新陽三年調閩未及兩年

擢守汀郡調臺灣司驤務公事旁午此書竟置之高

閣矣丙辰游歷福藩州縣紛呈邑志見其事有關係省志未載者請於督撫加意搜羅削繁補漏彙為通志鏤板以進頗無闕畧之憾而於威海一志則又振觸於中而不能已迨余撫閩時威海衛缺奉裁初附新設之榮成縣繼又省入文登縣雖因革無定當事者各有因時之見然念威海地處海隅形勢險要山川秀麗實乃東陲一奧區四百年來縉紳名流頗不乏人若無成書傳後則他日威海既不得以邑名志文登

修志又不能以威海僥入必沿革混淆不重可
惜哉是則前之修志猶可緩今之修志為倍急
也修志之舉前此可以任之他人今不得不引
為己責也正擬致書同里諸君子留心訪輯匡
我不逮適待罪

國門長子兆鵬來郡省視挈郭子克瞻重修威海
衛志一冊請質於余喜其綱舉目張洪纖畢舉
可與畢子衡南所作並垂不朽而余數十年以
來欲修而未及修之志亦可藉此稍慰因以鄙

見為參酌數條俟有力者付之剞劂具呈郡縣
附入文登志中庶不沒兩人前後之苦心云爾
乾隆七年歲次壬戌五月穀旦原任福建巡撫同里
王士任莘塹氏拜書於都門邸舍

重纂威海衛志序

歲乙巳余東鐸威海偕諸生講學論文徧歷域
內名勝有郭子堯瞻者常一一為余告曰某嶺
某峯可供登眺某川某澤可供漁獵某墩某堡
所以防不虞某坊某碣所以表節烈某橋某林
麓所以通行旅而利樵蘇他如官衙傳舍以及
郊壇祠宇雖不無廢興之感其基址猶歷歷可
考余曰叢爾彈丸風景如是數百年來獨無騷
壇碩彥彙為成書備輜軒之採者乎郭子曰是

衛之設原為防禦倭寇專尚武功文事缺如也
我

朝定鼎菁莪棧樸之化不遺遐陬康熙十一年

特允閣臣之奏分命各省府州縣衛並修志書爾時
苦於創始兼乏剏闕之資協濟甯海合刊一書
掛漏殊甚明經畢子衡南家藏私來一冊亦不
免缺畧先生留心掌故盍踵而纂訂之余嘉其
意諾其請緣視事未久風土未悉更以學宮榛
蕪堂廡傾頽方與二三同人謀所以補葺之者

此舉未遑也及八月郭子秋試未售余又有採
薪之憂相對鬱鬱乃謂郭子曰從前修志之說
此誠其時但我心緒亂不能相助為理君專任
其事可乎郭子唯唯遂鍵戶增訂按畢子舊乘
刪繁補漏凡後數十年未經紀載者採諸紳士
訪之父老循例編次三越月而書成起於疆域
終於外志其間學校官守祠宇武備諸條目部
分縷晰瞭若指掌可謂繼畢子而集其成者嘻
以郭子之才而復志存文獻留意經濟若此則
歸哉是為序

雍正五年歲次丁未二月中浣穀旦齊河張介正海
生氏書于衛學官署

重修威海衛志序

威海僻處海濱明初掌故寥寥宏治改元有纂修衛志之命邑人王君悅首創一編以備採擇巡察海道副使趙公鶴齡更定正之迨明末兵燹之餘書復散失我

朝康熙壬子內閣大學士衛公周祚疏請纂志

勅下直省府州縣衛共舉其事邑侯朱公孚吉正採訪間會甯海州牧楊公引祚請合修一志以省梨棗之費朱公限於力迫於時遂許其請未免

缺畧有間邑明經畢子衡南憂之私纂衛志若干卷閱數年山陰李公標來守是邦欲自為一志畢君遂錄稿以應然亦不克付梓也謹按威海衛界文登北鄙為天末荒徼朝鮮日本琉球諸舶時乘迅風突至故前明設世襲官六十餘員兩撥屯田捕倭城堡軍兵二千餘人復設陸前營馬步軍兵丁二千五百名

國初改設守備一員調防文登營馬步兵丁二百五十名巡哨坐鎮所以重海防備外警也後昇平

日久當事屢議裁併蓋未嘗親至其地躬閱形勢之故雍正丙午山東巡撫今相國海甯陳公世倌具奏邊衛重地應仍舊制民咸便之明年文大有纂修衛志之舉以邑志為主而參以郡志州志缺者補之冗者芟之畧者詳之訛者正之詮次未幾河東總督王公士俊行部至郡授意守土裁併邊衛將成山衛改為榮成縣以威海省入又因人戶以籍為定將威海附于文登縣而茲衛遂廢夫威海既裁似不可以志名然

疆域建置可裁而山川形勢不可裁也食貨可併而土宇版章不可併也學校典禮可省而文廟不可鞠為茂草也官守可汰而已往之甘棠不可剪伐也貢舉可歸縣治而歷朝之物望未旌之名流不可以湮沒也文大心有未愜因取丁未舊著再加纂輯其條例綱目一倣文登舊志以備他年芻蕘之獻告成後不敢自專乃郵寄都門就正於同里中丞王公咸一仁和候補京堂蔣公省齋亦參訂焉蔣故文大帥也數月

寄歸同里呂君荆石王君雪石呂君修齋陶君
經初復加校定爰繕寫兩本存之家塾以見文
大之惓惓於威海一志者蓋出於衆論之公而
非一人之私也

乾隆七年歲次壬戌九月穀旦威海拔貢生郭文大

堯瞻氏書於環麓堂中

威海衛志卷首

凡例

一邑舊志創自畢子衡南雖缺畧尚多然搜羅心苦寔權輿也文大於康熙壬子以後訪七十餘年人物事蹟殫心增輯壬子以前雖間有更定要以舊志為主不忘所自

一人與事有互見於郡志州志及舊志者謹擇其確者載之參互考訂不株守一編以為確據

一文登乙巳志部分井井較勝前志至寺觀不與

正祀並列名賢不與鄉賢同稱析人物與貢舉之後補世職於流官之前尤為得體故編中一遵其例

一疆域志載山川古蹟雖係文登所屬實多本衛墩堡斥堠故詳載之如軍馬嶺紫金道艾山黃埠張村雙島與衛無涉一槩從刪

一食貨志賦役全書係雍正七年從布政司領出七年以後事請之邑侯張公懋昭

一名宦鄉賢各為立傳料貢之學行著聞者標於

各姓名之下忠孝節義文學潛德另載事寔凡
誥命祭文祠碑墓碣一概不錄

一詩文必有關衛事者收之如事係一人一家酬
贈品題之作雖出自名筆載在前志者不敢並
存

一叙論多係丁未著定因綱目互異亦有新裁大
率照存衛時撰次惟食貨志論地方之積苦籲
當事之補救故統前後詳載識者鑒之

修志姓名

鑒定

賜進士出身通奉大夫原任福建巡撫邑人王士任

原修

歲貢生 候選訓導 邑人畢懋第

續修

拔貢生 黃陂縣縣丞邑人郭文大

增訂

優貢生 候選訓導 邑人王兆鵬

威海衛志目錄

卷首

凡例 圖形

卷之一

疆域志

星野

沿革

形勝

海運

延袤

山川

古蹟

塚墓

風俗

災祥

兵事

卷之二

建置志

城池

公署

都里

武備

坊表

橋梁

卷之三

學校志

學宮

社學

學田

卷之四

食貨志

丁徭

屯賦

起運

存留

鹽法

物產

卷之五

典禮志

祠祀 公儀 飲射 賓興

卷之六

官守志

職官 名宦 政績

卷之七

貢舉志

徵辟 甲科 鄉科 制貢 例貢 例仕

儒士 武科 武職 貤封 廕子

卷之八

人物志

鄉賢 忠臣 孝子 節義 文學 潛德

列女

卷之九

藝文志

記 跋 引 呈 序 議 申文 奏疏
記畧 詩 詞 歌 賦

卷之十

外志

流寓 寺廟 仙釋 怪異 叢譚

